

白
雪
樓
詩
集

白雪樓詩集卷四

七言古詩

送靳穎州子魯

華陽館前桑葉飛。荆軻臺上送將歸。爲言擊筑
悲歌者。當時酒人今是非。太守寒帷薊北來。燕
山忽斷楚天開。郡中曉月雩婁出。霧裏秋濤桐
柏迴。黃金璽書發明光。東走穎州西豫章。君家
兄弟二千石。承恩不數尚書郎。朱轡雙出領專
城。五馬踟躕五馬行。漢主乘春徵計吏。小馮何

讓大馮名

送新喻李明府伯承

爾昔紅顏客薊門。獻書不報哀王孫。一朝致身
青雲裏。座上還開北海樽。余亦題詩郭隗臺。燕
山秋色對銜杯。論交共惜黃金盡。此處空悲駿
馬來。可憐郢曲今亡久。下里之歌吾何有。文章
稍近五千言。雅頌以還十九首。才子新傳白雪
篇。江城忽借使君賢。那堪西署爲郎者。多病離
居卧日邊。

贈張子含茂才

憶昔中丞全盛時，少年裘馬相追隨。
忽逢世變夙心違，逆旅荒涼舊識稀。
古來萬事皆如此，何用空悲昨是非。
流水無情白日速，紅顏猶在黃金微。
飲君莫辭燕市酒，欲行不行重携手。
青雲今有故人存，好贈綈袍哀王孫。

刁斗篇

陰山戰合胡天黑，漢兵大呼單于北。
邊秋日落五原屯，磧火夜連千竈食。
驃騎橫戈拂鉄衣，悲

風黃草白榆飛渡河鳥陣旌旗伏卧壁龍沙鼓
角希征人馬上援枯骨滿地清霜刀斗發朔氣
遙傳瀚海雲寒聲亂動輪臺月掩笳驕虜聽垂
泣按劍材官怒指髮宮女琵琶咽逝波使臣旄
節彫幽窟誰能絕漠掃妖氛哀響如今不可聞
六郡少年思轉鬪金猶憶李將軍

送張子參募兵真定諸郡

薊門昔在胡塵中匈奴火照西山紅
羶廬相望赤縣隘腥羶未厭神畿空
君王拊髀過郎署侍

臣扼腕談邊功每飯不忘鉅鹿戰千金先發萃
陽宮邯鄲少年游俠子腰間匕首縣秋水出身
願屬羽林兒橫行誓奪單于壘騰裝夜別縱博
場貫酒朝辭挾瑟伎馬上風雲八陣成帳前鼓
角三軍起故人新貴寵軒墀亂後高名衆始知
國士漸看投筆至王恩况許請纓爲天寒恒嶽
倚長劍雪滿滹沱擁大旗歸來漢苑生春草見
爾論兵散幕遲

齊俠行

簡書八道發明光詔徙群豪赴朔方神武臨軒
眈虎視將軍秉鉞鬱鷹揚山東十二諸侯國海
濱五百義士鄉厭亂齊臣思定伯殷憂漢使出
勤王敵驕擬縱田單火客憤能飛騶衍霜毅騎
人人白羽箭民兵處處綠沈槍九河寒色旌旗
動岱嶽秋陰鼓角長各倚少年輕燕額曾經遣
戍守漁陽被髮左衽豈受賜排難解紛不可當
往歲潢池先陷陣三時大戰銀冶場功名未致
有莊賈肝膽欲傾無孟嘗天子只今顧西北男

兒俠骨埋邊疆

賦得金谷園障子

誰將金谷傳毫素。座上無人不自顧。乍展旋驚
澗水流。纔開已識河陽路。四壁真看片錦圍。中
庭如見雙鬟度。移席休臨墜妓樓。解衣欲挂沙
棠樹。彷彿明妃出塞吟。聽來未必梁塵誤。詩成
酌我。我豈辭。便過三斗。無論數。綠珠安在。恰當
壚。似留且往。勢可呼。意慘崑崙紫。窳篠色寒滄
海。紅珊瑚。君家富貴合如此。此時那知有障子。

縱然客散掩空堂。猶聞夜夜春風起。

送申職方謫萊州推官

嫖姚三疏奏明光。九月王師掃大荒。不求十萬
羽林騎。從軍但請尚書郎。看君未是侯門客。草
檄論兵一當百。片言不合徑拂衣。坐使元戎氣
蕭索。漢主臨軒送逐臣。褰帷海上及行春。正逢
匹婦銜冤雨。一灑浮塵不污人。遊燕曾携短七
首。袖裏虹蜺今在否。出關若見棄繻生。爲余持
贈單于走。

送趙員外行邊

狐白之裘紫驕馬。鳴鞭東走漁陽野。自言

天子授長纓。明光殿前三使者。飛檄遠度桃花
山。昨日遼西校戰還。吹律春風回黍谷。揚旌暮
雪灑榆關。關門一望煙塵色。抵掌志馳伊吾北。
豈獨秦人重繞朝。誓令羗虜避充國。此行不按
督亢圖。欲畫地形取匈奴。指揮千障鐵如意。出
入雙鞬金僕姑。驃騎將軍綠沈甲。鷓鴣大夫黃
石法。蹟裏兵屯種玉田。雲邊燧起彈琴峽。元戎

幕府贈吳鉤太守離歌岐麥秋。看君歸奏稱上
意何足道哉萬戶侯。

賦得狼居胥山送李侍御

材官十萬絕大幕。踰河一戰胡兒却。夜縱翼兵
襲章渠。繫以往封狼居胥。姑衍山頭列旗鼓。中
壇擁纛陳首虜。帳前面縛三當戶。驃騎將軍醉
歌舞。北風千里雲摧頽。瀚海波濤蹴日迴。漢家
天子雄才哉。捷書親發柏梁臺。君持繡斧五原
郡。牧馬單于不敢開。黃沙白草寒冥冥。今年爲

王犁二庭

送徐汝思郎中入蜀

岷江東流何渺茫。仙舟西去指華陽。峽深當晝
暗雷雨。白帝青天豁大荒。一望峨眉山上月。風
吹寒影墮瀟湘。益州部裏占星使。草色春時接
夜郎。客將河漢支機石。歸自乘槎歷七襄。萇弘
碧血埋難化。杜宇啼魂怨未忘。胡不爲我排閭
闔。願君致之北斗傍。即今叱馭九折坂。金精元
氣參翱翔。雪峯突兀三飛梁。中挂鳥道通蠻方。

司馬長卿子虛賦。其文可以陵太蒼。臨邛小監
揚得意。函薦詞臣。謁建章。後來此事益寂寞。煙
塵萬里遙相望。

葉舍人

舍人家世稱儒素。供奉班聯起居注。仙郎盡識
鳳凰毛。父老相傳驄馬步。當日蘭臺抗疏還。讀
書高卧柳亭山。至今猶憶張文紀。年少官微犯
帝顏。聞君夜入蓬萊直。歸夢時時動秋色。翰染
金莖彩露寒。廬開玉樹青天逼。回首南雲春事

繁浮丘峯下小桃源。他時搖艇新安水。坐把江
花醉故園。

送謝茂秦

孝宗以來多大雅。布衣往往稱作者。謝家玉樹
操郢音。其曲彌高和彌寡。寓梁曾曳王門裾。遊
燕欲薦中涓馬。豈無冠蓋映當時。滿眼悠悠世
上兒。文章千載一知己。交結何須鍾子期。此物
有神兼有分。富貴浮雲不與之。盧楠坐銜越石
恩。醉後感激肝膽言。蒼鷹睚眦鸚鵡賦。身挂羅

網何由翻。殷憂楚秦庭。哭遂雪黎陽。國士寃。
歸去東將釣滄海。安能貧賤常。丘樊早借江鴻。
報消息。或卧春雲且故園。

送太醫令周一之從大將軍出塞

武皇按劍明光宮。夜發材官六郡雄。臨軒親遣
上將軍。誓掃匈奴成大功。白羽九邊傳漢月。霜
戈千里排胡空。轅門豈聞天子詔。帷幄寧多策
士風。書記翩翩爾其選。志勒燕然禪姑衍。業許
原嘗念已深。情憂平勃交仍淺。藥囊每擬提荆

輻駟馬何曾避桓典。淮陰惡少舊相輕。朔方健
兒知姓名。身爲揖客元戎府。意氣秋高出塞行。
二百年來無一戰。今日王師遂北征。便當滅虜
始朝食。不繫單于不解兵。

南溪老樹行

老樹橫溪十畝陰。下有跳波三百頃。酒罷捫蘿
坐其上。白眼青天何不逞。牛斗之間見浮槎。蒼
茫宇宙成漂梗。念我平生湖海客。衣裳泠泠風
馭冷。文章八代俱望滄。心事幾人同哀郢。醉裏

誰堪此陸沈。俠來氣與千濤猛。洛浦明珠舊寂
寥。渥注神駿空馳騁。翻然大叫觀者摧。那知世
路滄洲永。投足還探河伯宮。俯身欲拾中流影。
驪龍蜿蜒垂霧雨。虹霓繚繞含光景。湏臾力疲
神亦眩。乾坤低昂發深省。最竒披髮泅吕梁。願
言洗耳臨箕穎。初看長駕出鼃鼃。豈云吾道終
蛙黽。王郎驅石到渤澥。徐子招招迴舳舻。此時
共濟失狂瀾。却悲胥溺情難整。泥塗詎可困豪
俊。男兒相逢誇項領。遂憶鳴鞭昨夜歸。湘娥漢

女猶延頸。群靈至今未敢散。寒江颯颯開塵境。

送公實還南海

梁生偃蹇誰與倫。梁生偃蹇無與倫。爲郎十月不厭意。上書乞歸南海濱。文章往往迂時好。富貴安得嬰其身。獨存肝膽論交者。一一凌雲作賦人。憶昨擊筑飲燕市。酒酣以往氣益振。黃金之臺空嶙峋。萃陽之館摧爲薪。駒駉駉耳俱良馬。劍客博徒皆俊民。梁生徐生情最親。宗生王生詩更新。經過但坐歌白雪。罷曲彷徨若有神。

揮毫夜夜搖星辰。襟期矯矯何能馴。梁生此事
成萬古。欲別牽裳遂具陳。羅浮之山何崔嵬。下
臨莽蒼波濤開。維舟跋浪長鯨出。倚杖垂天大
鳥來。北望中原寥廓哉。飛崖坐攬百粵色。群峯
黝渺行風雷。梁生之廬構煙霧。千尋薜荔青摧
頹。有時高咏反招隱。巖壑無人秋雨哀。尉佗椎
結本趙俠。陸賈縱橫亦漢才。丈夫有道在龍蟄。
還能與世相徘徊。梁生何爲終蒿萊。梁生慎勿
終蒿萊。

擊鹿行

并引

余往與王生過子與見伏鹿於庭戲相謂曰
余將携徐夫人七首刺此鹿麋腊之也生豈
不願爲我掎角之哉又與王生過子與則子
與刺殺此鹿食王生旣而宗生亦至相與批
脯飲也亦大豪舉哉乃各賦擊鹿行壯之矣
徐卿意氣殊不偶買鹿百金求其牡萃堂燕客
忽自放醉把邯鄲鐵七首須擬麟從帝藪游未
聞鹿觸匈奴走高材吾黨復誰過文章矯矯驅

群醜失日難將四海求。逐來定死諸公手。毛瀝
旋疑霜雪寒。角摧更見珊瑚朽。王郎大叫奉銅
盤。接飲其血軟以酒。顧我前呼歷下生。與君相
愛爲君壽。舊時疾足今能否。安得新詩滿人口。
須臾碧眼胡兒至。落碁脯腊無不有。下箸已畏
翠釜空。纖羨更出青閨婦。衆看機上肉如陵。覆
蕉尚在隍中守。嗟乎曲士夢何久。徐卿獨醒可
與友。

送元美

王生二十趨明光。是時作者不可當。世上之名
他自誤。湏君千載垂文章。夙昔陸沈秋憲府。風
塵慘淡尚書郎。心知此物難再遇。片語論交燕
市傍。携手七陵朔漠色。悲風九月吹白楊。居然
宇宙見雄俊。睥睨今古神飛揚。流俗紛紛失肝
膽。那能結客聲利場。近日操觚滿京洛。江河決
注非其長。家握靈珠戶和璧。及逢周客皆深藏。
高才梗楠與杞梓。吾道麒麟或鳳凰。清廟遺音
壯昭代。天庭火藻縣衣裳。生也經綸斯濫觴。混

塵安取金躍冶。養銳更羞錐處囊。伊周屈宋儻
易地。鈞衡藝苑俱稱良。生也爲情誠彷徨。但願
右挹擊筑之荆卿。左拍接輿之楚狂。二豪侍側
乃裸羸。四子講德如蜩蟬。舉觴白眼天茫茫。秋
風胡爲歸故鄉。亦欲送生從此去。留生不住悲
河梁。彩虹千尺挂碣石。贈生千里爲帆檣。

揚山人四首

茗溪之水何泠泠。吳山一峯天目青。千林萬壑
子雲亭。從他世人還解事。白頭不厭太玄經。

其二

吳門市卒能逃名。長安貴人非其情。南山薄田
春自耕。盛世爲農亦足老。少年何用隨諸生。

其三

千筐湖綿白雪開。滿江稻色黃雲來。山中客醉
領其頤。自言七十岩耕者。帝於我有何力哉。

其四

長裾不爲王門賓。千金盡散江湖人。菰城一卧
三十春。看爾紅顏逐燕雀。終然白髮行風塵。

送子相

自作白雲郎。未厭滄洲意。偶然薄祿混風塵。論
交千里賢豪至。元美翩翩多奇氣。南越梁生亦
雄視。二子招携從此逝。爾今卧病緣何事。綠鬢
還鄉已壯遊。錦帆十月下揚州。移家好住昭明
樓。種瓜莫羨東陵侯。文章萬古垂大業。富貴浮
雲非所求。知君林壑百不憂。圖書四壁高枕秋。
世人那識淮海士。須行便爲名山留。丈夫義豈
辱顏色。使我摧眉去即休。安能訾喤向權勢。咄

惜空令達者羞。夙昔竟寥濶。後來復決茶。相看
一別雨墜天。他時神劍來。精爽旣言郊。數走麟
鳳。朝廷寧得無吾黨。卿也抽簪且偃仰。漁陽日
影黯如靨。薊門雪花大於掌。馬上燕歌變徵聲。
壺中酒盡君當往。

俠客行爲子與贈吳生

本自吳越游俠人。結交燕薊少年場。長裾不曳
朱門裏。擣菹大叫青樓旁。被酒目攝羽林驍。擁
金作使邯鄲倡。弟畜灌夫。師事田光。得意一言。

失意一言相怨。一坊相慕。一方男兒過逢。好驚
座。世事握齷。寧陸梁。姓名何惜。借輕薄。出處未
須論。侯王親知。猶向隅。有錢徒充囊。讐家猶戴
天。有客徒滿堂。猛虎可值。俗子莫當。平生片心
照秋水。明日報恩還故鄉。

留別子與

從君幾醉燕京酒。舊遊花月回白首。相看零落
眼中人。二子河梁重携手。憶昨青山坐西署。于
今此事成不朽。交態蕭條爾自諳。浮名慘淡吾

何有爭道賢豪擁上林。華陽臺館盡黃金。長卿
詞賦徒壁立。曼倩佯狂合陸沈。平生得意向知
已。常將顏色當同心。北望諸陵一拊髀。悲風千
里來寒陰。春草如雲覆四野。我行逶遲五其馬。
十載爲郎願已違。出門况復悠悠者。漢臣猶未
老。馮唐每飯豈忘鉅鹿下。歲晚江湖夢獨遙。秋
深鴻雁書堪把。

題申職方五嶽圖

誰將五拳石。錯落余之堂。坐看素壁纏雲霧。安

得群峯挂屋梁。更愁深林暝難入。嵐影明滅侵
衣裳。左眄欲生滄海日。右臨少昊凝清霜。掃練
白沙走朔漠。回毫紫蓋垂炎荒。湏臾二室峻嶒
出。杳然置我煙霞傍。不聞吹笙控飛鶴。浮丘子
晉俱冥茫。良工拓筆天爲開。長風西遂層陰來。
中庭無人數移席。巔厓乍墮松杉摧。眼前突兀
太古色。九州慘淡如浮埃。宓犧神農未誕降。元
氣始判洪濛哉。大江浩浩黃河流。巨野相望縣
莫秋。異代猶探秦漢策。真形或結金銀樓。馮軒

忽驚去千里。青鞵竹杖胡在此。復疑窈窕迷歸路。何當稅駕聊徙倚。捲簾逾添空翠寒。張鎧更愛夕陽紫。邢襄小吏困時名。知君雅意憐泥滓。

送永寧許使君二首

邢州十月凋白楊。城頭出雲垂太行。把酒相看日欲墮。五馬踟躕大道傍。問君胡爲萬里去。小臣罪合投窮荒。我聞西南羅施國。風氣鬱塞殊陰陽。長官椎髻見朝吏。海蠻醉鼓橐中裝。男兒貴至二千石。何地不可稱龔黃。壯遊須令百粵

盡探竒更得浮沉湘。求寧自惡無瘡癘。明年雨露生還鄉。

其二

使君落魄高陽徒。結交李生仍狂夫。醉後裂背一相視。怒髮上指浮雲徂。白日並堪出肝膽。黃金誰爲收泥塗。長安少年太巧宦。依倚權門何事無。失策始就公府辟。得意豈領蠻夷符。爾今折腰揖下吏。我更掩泣臨窮途。竒數能令遇合變。美才常被功名愚。武溪毒淫湏自愛。九重沈

深不可呼憶昔終軍繫南越鄉里小兒何其處
荒服盡霑大漢德單車入郡歌來蘇固知永寧
之州纔如斗天子求賢三輔圖儻有徵書到遷
客五馬好過秦羅敷

送王給事使潞

憶昔胡塵暗薊門六軍如雲集闕下天子授鉞
臨軒檻宜陽王公其人者風流舊出城朔方簡
在新除大司馬是時將帥實跋扈傾耳履聲入
北斗引經荅詔動稱意草檄提兵常在手帝力

自堪制閩外。股肱佐命吾何有。一從誅亂朝廷
清。四海亦重尚書名。看君少年青瑣客。漢家今
得韋玄成。袖裏彈章百不避。囊中諫疏垂欲行。
主恩二晉持節使。上黨諸侯帶礪功。泛槎春度
濁漳水。設醴夜宴麇祁宮。歸來煉石補造化。論
思庭諍才何雄。

郡齋同元美賦

夙昔紅顏一大夫。乘軺河朔何爲乎。除書歲下
不得調。鼓其刀筆寧壯圖。帝恩初欲存折檻。

謂爾祝網從皇都。相逢但飲邢州酒。太守况即
高陽徒。庭前秋色正慘淡。囊裏新詩復有無。醉
歌出塞雲中曲。朔氣颯沓來飛狐。路傍小臣久
汨沒。安得座上開江湖。眼前大雅竟誰是。作者
如山道各殊。更須一日論萬古。揮毫振臂群雄
呼。維時海內稱二子。高名自喜王生俱。白雪青
天動蕭瑟。臺郎郡吏同崎嶇。楚壁照隣不敢獻。
蛾眉在宮還自塗。王生仰視浮雲徂。矯手將我
領下鬚。與君周旋在今日。還能百萬來長驅。忽

然神氣回莽蒼。孤城搖落相踟躕。

跳梁行寄慰明卿

武昌季子吳國倫。左遷三載匡廬春。紅顏便着
風雲色。白眼豈是功名人。邢州太守昔入詔。猶
自金閨侍從臣。顧問片言搖日月。彈章一字動
星辰。雖然舊屬平津吏。常苦跳梁不可致。調笑
縱橫倒四筵。交驩往往非其意。世間那得郢中
歌。君但論詩吾且睡。何須更比謝生肩。但應獨
把王郎臂。蕭條頗似東方生。南康郡裏憶承明。

文彩縱然傾漢主。恢諧難以取公卿。畫眉石鏡
二女僕。濯足長江九派清。此兒尋常未易識。偷
桃賣藥行妖精。近來猶尚馮陵否。俯仰浮沈無
不有。朝讀司空城旦書。夜沽茂宰柴桑酒。成敗
寧關達士心。卷舒終在朝廷手。隨他肉食作雄
飛。饒我褐衣稱下走。黨禁重開祝網年。一時逐
客寵光偏。晚收已抱泥塗恨。更謫如何不可憐。
事急誰能馳叩闕。家貧未擬罷歸田。再來地僻
逾高枕。就使荒涼給俸錢。壯遊萬里君須見。青

瑣鳳池元不賤。使氣能令魑魅藏。出身曾厭撓。
捨變楚狂。豈止接輿賢。秦孽猶堪背城戰。回首
畏途真自知。一官不絕。纔如綫。難將此物鬪。鞫
鞫。姑口含沙。未可當四海弟兄。堪並起中原我。
輩正相望。總看棄置風塵裏。不作踟躕道路傍。
鼓枻更逢漁父笑。豈應憔悴老滄浪。

此兒行重寄明卿

我聞南康大如斗。明卿佐理常什九。昨日中丞
抗疏薦賢聲。輒滿朝廷口。豫章計吏入圖事。愛

君未敢援以手。小臣憐才上白狀。相公良久疾
其首。量移亦已從浩蕩。不然徑逐此兒走。誰知
片言觸忌諱。畢竟功名成掣肘。丈夫失意分自
當。窮來傍人人避藏。苦我折腰骨太勁。看他伏
謁項能強。縱令慢世無不可。似爾干時豈所長。
莫作拂衣少年態。宦遊須使及春陽。大舒楚歌
小舒舞。是處江山好斷腸。王郎至今棲北海。帳
前萬騎綠沈槍。

拂衣行答元美

五原驅車興殊淺。三秦卧病秋云高。束帶那能
見長吏。談經何以隨兒曹。上書一日報明主。
願乞骸骨歸蓬蒿。小臣采薪業不佞。聞道巢由
亦已逃。拂衣中原風雨來。群公祖帳青門開。二
疏一去三千載。大夫未老寧賢哉。新鄉城西重
回首。當時叱馭其人走。路傍伏謁莫敢動。囊裏
俸錢君但取。此輩交情雖可見。吾徒大名終在
口。于今偃息南山陲。閉戶不令二仲知。負海少
年大跋扈。遣使問我抽簪期。百爾不分一狂客。

余髮種種何能爲。玄經半卷常自誦。濁酒千鍾醉不疑。五子江湖正漂泊。黃鵠摩天慕者誰。

荅許右史二首

黃鬚芄芄田舍翁。傾身坐向錢孔中。長頰便便美少年。行步顧影私自憐。誰知腐鼠能爲祟。縱是神仙有播遷。使君似識浮雲意。蹉跎實爲功名利。已拚酒隱當吾世。潦倒佯狂百無忌。濁醪恰供十日飲。酣法須與常時異。五斗乍可調燥吻。飛觴一子雄相視。醉殺不作傲杯人。邇來那

得獨醒事。魏文大白滿如月。曾託屬車稱國器。
若言此物非其任。爾家破瓢亦應棄。

其二

王門隱者身坎坷。老曳長裾裾婀娜。自言能料
一生事。及至干時計常左。從它慘淡復爲誰。即
得新詩題向我。雨雪蓬蒿共三逕。春色傳伶餘
藥裹。濁醪但熟貧亦足。微官纔罷病輒妥。胸中
壘塊故須澆。乘興往來無不可。白眼生成薄祿
相。青山合就漁樵夥。趙壹疾邪衆所擯。鄒陽暗

投才應坐羨爾悠悠世上情。回頭數子殊么麼。

送萊蕪蕭簿

蕭生業本儒術起。稍因讀法得其指。栖息十年
白鹿洞。擔囊一卷青烏子。岱宗雄蟠大海濱。衣
冠氣王中有人。我家松檟三千樹。鞍山東望華
不注。爲說干時常轍軻。獨憐明主能知遇。萊
蕪作簿更誰群。但恨無過范史雲。釜裏蠹魚堪
自見。鞭下虫蛆詎忍聞。着君才豈催科拙。請謁
公門非所屈。藩臣荅詔誤承恩。翻然遂就遷官

列匹馬悠悠復路岐。即今失意欲何之。同鄉冢
宰諳名姓。府掾郎曹佇可期。

歲杪放歌

中年著書一字無。中歲學道仍狂夫。勸君高枕
且自愛。勸君濁醪且自沽。何人不說宦遊樂。如
君棄官復不惡。何處不說有炎涼。如君杜門復
不妨。縱然踈拙拙。非時調便是悠悠亦所長。

贈殿卿

前年賜環承主恩。去年解裾辭王門。身經畏途

色不動心。知世事。口不論。自顧平生爲人淺。羨君逃名。我不免。自憐垂老尚馮陵。羨君混俗。我不能有酒。便呼桃葉妓。得錢即飯蓮花僧。

金吾行贈戴將軍

先皇諸將何其雄。君家大人國士風。賜錢留起嫖姚第。詔宴數入蘭臺宮。五雲忽變石城氣。七校親隨萬乘東。當年帶礪山河在。四海車書日月通。侍從敢聞潛邸事。朝廷竟錄代來功。此時十歲羽林孤。躍馬能彎兩石弧。漢主臨軒求

故劍承恩一拜執金吾。生成燕頷寧辭武。得奉
龍顏不羨儒。三提鹵簿陪陵寢。再護樓船下
郢都。禁中自失張安世。天上還看周亞夫。

逼除過右史水村江山人同賦

夜來北渚北風急。打頭雪花大如笠。片紙東飛
右史書。詰朝小作湖中集。到門白鳥出高巢。繫
馬南山迸人入。使君亭午未解醞。肅客登筵一
長揖。地僻兼無俗子妨。樽空况有鄰家給。意氣
還須我輩看。功名但任兒曹立。瞥眼旋驚青歲

得沾膏莫放金杯澀。世上悠悠已自諳。即今不
飲嗟何及。醉聽楚調起寒雲。綵筆馮陵朱綵濕。
平生多少伯牙心。此日因之寄篇什。

賦得雁池送許右史游梁分奈字

漢家藩國稱冠帶。雁池多暇爲高會。賓序同推
枚叟尊。星潢共指梁王大。賦成錦字映長流。酒
酣飛羽傳寒瀨。藻翰常生授簡中。潺湲不散鳴
箏外。清影朝含竹苑霜。悲聲夜雜吹臺籟。白首
君恩豈稻梁。朱門旅跡非蕭艾。極知慕侶倦游

人秋來肺病誰能奈。

道逢郭子坤擁妾戲柬

城東桃花飛路傍。春風忽送孝廉郎。自擁佳人
馱細馬。時臨綠水照紅妝。羅裙已奪石榴色。禿
袖單衫杏子黃。蹋鎧微籠雙玉趾。揚鞭咲起兩
鴛鴦。同棲孔雀言猶妬。並帶芙蓉意始償。爲謝
使君休借問。郭家少婦身姓王。二八盛年真擅
寵。只今三十尚專房。持齋能苦頭陀行。發願曾
燒頂廟香。浩劫自知仙女分。他生長在世尊傍。

每脩好事辭書舍。但有佳期入道場。纔著霓裳
顏更少。但盤雲髻。壻先狂。假令不信吹簫侶。試
向秦臺看鳳凰。

和許長史箏伎篇

君不聞秦箏多曼聲。平臺女兒新長城。家本邯鄲行步好。生年十三指爪清。安得此雙絃索手。那能獨酌高陽酒。正值傾囊無俸錢。將來換馬還肯否。自從解贈同心結。何惜樽前香腕折。幾回玉柱雁池飛。春秋散作梁園雪。合就羅敷陌。

上桑含顰一轉發中堂。遙知華髮王門客。縱是風流也斷腸。

酬李東昌寫寄白雪樓

并序

樓在濟南郡東三十里許。鮑城前望太麓。西北眺華不注。渚山大小清河交絡其下。左瞰長白平陵之野。海氣所際。每一登臨。鬱爲勝觀。東昌李使君子朱以讀白雪樓集於廣川馬中丞家。咄然吐之。爲圖寄而攀龍贈焉。如此。

詩名東郡沈隱侯。那復擅竒顧虎頭。江湖盤薄
有能事。畫我山中白雪樓。揮毫已驚海色至。無
乃魚驅蛟蜃遊。湏臾百里岱陰合。只尺疑聞清
河流。華不注山得非兩。平陵以西胡獨秋。松風
似欲卷綃起。良久看雲失去留。丹青快意擬如
此。丘壑過人老郎休。使君實解郢中調。爲爾深
知宋玉愁。

荅寄殿卿見夢之作

憶昔紅顏日。携手一別三年非不久。縱使天台

記阮郎也。應梁苑稱枚叟。故人多病卧青春。華髮如蓬自看醜。漫爾風流更旁騷。從他憔悴仍耽酒。悠悠世上竟須疑。夢裏相逢知是否。

和殿卿春日梁園即事

梁園高會花開起。直至落花猶未已。春花酌酒酒自美。丈人但飲醉即休。纔到花前無白頭。紅顏相勸若爲留。春風何處不花開。何處花開不看來。看花何處好空回。

荅寄子威

劉生家本安東子不爾高名那如此十載論交
少聞問君胡尺書數千里蒼頭大奴前置辭主
人束髮重知己家本闔閭城下兒清風獨爲延
陵起便從出刺三河還攬轡爭誇按百蠻早歲
升公趨漢署只今謝客卧江關雖言萬里歸來
好乍可論交到誰老猶作鳳凰池上看窮途殺
更耽文藻中間詆蕩復王郎伏臘扁舟發太倉
但語即翁常在口彼時多士儼成行宦情漸覺
綈袍勝秋興翻隨綵筆強魏倩一珠纔照乘主

人雙壁竟登塲，倡余和汝篇。相及日居月，諸業以集共。道提戈虎穴，迴儻容投謁。龍門入開械，寒色散陽湖。白雪樓空嶽，影孤不盡雄。才推二妙止，如古調已。吾徒一當單于，則豈敢相遇中。原尚足圖，但語主人。湏自愛一時長句，似君無送鄭生遊大梁詩序。

鄭生者名文賢，楚之雲夢人也。少慕魏伯陽之術，徃徃談長生。自雲夢來關中三千里，持一囊藥耳。所至逆旅，醫小兒即食其嫗。醫老

即食其子弟醫婦女即食其夫度三千里如在里巷中矣然不爲糈也其來關中庶幾望見能爲長生者焉余蓋苦多病三十年於此言醫也即未嘗見醫視脉如生者豈其診書異有它禁方邪生又自言醫且五十年於此手指之附人脉多於握七著咀咬如丘陵即未嘗不精神與病者通長桑君豈實視見垣一方人哉不察見脉而治病其礙豈啻垣一方關中故多賢豪人即如大中丞何公博物

君子也。亦言生矣。余又言秦越人來長安遊
時事。生未嘗不輒苦其術。而隱之不得。屬余
在告將歸。生亦欲遊大梁。則關中自大中丞
許公。大司徒劉公以下。皆賦詩贈之。而余序
其右方云。

君不見黃鵠高飛未可羅。榆枋之雀柰我何。拂
衣春色爲黯淡。故山高卧白雲多。風塵誰識大
梁行。夷門輕簿笑侯生。虛左莫言公子事。今日
邯鄲已罷兵。金丹初出照人寒。瑤草千年老鴟

冠更欲清秋觀渤海那能渴病滯長安

代香山寺老僧答

老僧何處來迎客身無袈娑足無舄雖有弟子
今流離獨向空山種麻麥先時長者布黃金大
師說法如來席浮圖中霄天樂下禪臺雨花坐
盈尺共道當朝少遊幸唯此祇園有恩澤綵仗
晴連鸚鵡林宮娥晚傍蟾蜍石侍從求看貝葉
編焚香再拜開琳碧我往能言西域文珠函爲
取華嚴譯自復懸燈香爐峯君其問臘庭中栢

何曾馬繞招提鳴未見沙門畜四兵羯虜公然
馳赤縣湖外秋風笳吹聲猶疑窮谷豈遽至已
聞野哭尸縱橫裹創被血竄榛棘問之不荅慘
且驚須臾牛羊蔽陵壑三騎五騎掇長纓抨弓
北嶺飲南澗驕氣直欲凌欃槍一騎常驅百漢
人一人常聯二騎行翻身仰射果惡落束茅縱
火燒朱薨豈無卓錫答其背佛力不祐人心傾
西堂北丘綠業惡寺前荒冢遂崢嶸亦是官軍
入援急匈奴颺去歸其營匍匐漸從草莽出晝

伏夜走同狐鼯衣鉢蕩盡微軀在性命真如飛
鳥輕丈人豈願聞喪亂神州豈宜有戰爭故人
更邀任廬嶽萬乘垂衣右北平燕中耆舊寄書
說早晚單于和議成語罷空林轉蕭瑟茫茫天
地終何情

白雪樓詩集卷之四

白雪樓詩集卷五

五言律

酬皇甫虞部寒夜書懷見寄

兄弟播清徽。詞林振羽飛。再來郎署重。何謂宦
情違。雪夜留沽酒。寒燈坐掩扉。共嗟羈物役。歲
晏此依依。

圓硯效徐庾體

片石分雲出。良工向月刪。自疑臨壁水。誰爲縮
壺山。洗墨沈金鏡。可以斷玉環。畫眉京兆婦。織

指曲池間。

秋扇

自從團扇棄。空復掩梁塵。寒影收雲葉。清光暗
月輪。誰憐班氏女。薄命漢宮人。但使絨蘭笥。君
情會更新。

同皇甫縉部寒夜城南咏月

片月挂遙岑。層城曳素陰。寒分宮樹淨。影落御
溝深。結冷悲征笛。勻霜上擣砧。西園芳宴後。白
雪復誰吟。

元夜

公子聯鑣語。佳人把袂歡。
星橋雲外出。火樹雪中看。
夜色開清禁。春醕許從官。
仍聞祠太乙。達曙禮仙壇。

登省中樓望西山晴雪

忽見西山雪。高樓重倚闌。
數峯城上出。落日署中寒。
佳色繁天仗。清光切露盤。
小臣操郢曲。願獻聖人看。

憶弟

新醪楊柳色。不醉欲何如。薊北三春雁。山東二
弟書。宦情閒遂淺。人事病全踈。未擬酬恩去。空
令憶舊廬。

初夏趙氏園亭

獨值春風後。幽期此重過。開尊黃鳥至。高枕綠
陰多。簪綬殊閑事。乾坤一放歌。淹留君莫厭。吾
道本巖阿。

送孟得之

十載薊門客。秋風見長年。思家明月夜。驅馬白

雲天來雁授衣後。黃花落帽前。何人過携酒共
醉黎陽川。

登省中樓

蕭瑟賦悲哉。西山爽氣開白雲。海色斷落日。秋
陰來。砧高長樂苑。雁下華陽臺。如何此時望客
思轉難裁。

酬徐員外舟中新詠見示

何處逢搖落。秋風又別家。天清鴻雁影。江滿荻
蘆花。明月留仙佩。寒星犯客槎。到來開篋笥。新

句。動。京。華。

送諸光祿還於越

幾年東省月。坐憶故園遊。忽有緘書至。蘭亭襖
事修。芙蓉天鏡曉。風雨石帆秋。到夜應逢雪。門
多乘興舟。

長陵

明。裡。趨。歲。序。陟。降。儼。昭。回。容。物。中。原。在。乾。坤。北
極。開。松。楸。千。騎。入。風。雨。百。靈。來。共。話。犁。庭。從。遺
弓。重。可。哀。

朝陵夜作

上陵無不美。秋杪更宜看。風雨朝佳氣。旌旗擁漢官。星流千嶂過。月出萬松寒。倚馬清鐘外。新霜滿玉鞍。

白雲樓

諸郎難得意。非是敢沈冥。拙宦無同病。清時有獨醒。千家寒雨白。雙闕曉煙青。又值高樓雁。寥寥不可聽。

送楊子正還濟南

我家白雲渚。落日掩孤城。讀書草堂上。濯纓湖水清。古來失意事。不獨名未成。北風敝裘雪。誰見棄繻情。

重送揚生

十年湖上別。風雪此相親。把酒論時事。霑衣向故人。浮名青歲換。生計白雲貧。但去卧芳草。山中鴻雁春。

殿卿至

駿馬何當出。金高郭隗臺。雪中春酒熟。書後故

人來白首文章事。青雲王伯才。誰爲一知己。念子正悠哉。

送殿卿

嗟君復失意。吾道轉堪疑。白雪論先達。青雲合後時。落花寒食過。載酒故山期。莫以揚朱淚。春風灑路岐。

章行人使潞藩

使者持符下。風塵叱馭前。諸侯城赤狄。列嶂黨青天。牟麥祈年時。芙蓉避暑筵。相逢多愛客。共

賦遠遊篇

十六夜集劉子成宅

羽書三十度。飛騎動長安。今夜樽前月。還同燧
火看。入門清影滿。久坐素華寒。何處關山引。如
悲行路難。

聞砧

未夜盧家婦。深閨坐自傷。拭砧散明月。投杵上
清霜。別恨繁鴛綺。哀音急雁行。同袍征戰盡。刀
尺斷人腸。

送張比部募兵秦晉諸郡

天威嚴滅虜。使者出秋官。白羽徵兵入。黃金結
士權。風雲千騎動。雨雪二陵寒。無易行間客。能
登漢將壇。

送沈郎中守順慶

見說褰帷處。千山擁使君。嘉陵渡春水。棧道轉
秋雲。郡下平蠻檄。家傳諭蜀文。病餘饒卧理。能
不憶離群。

春日常氏園亭同元美賦二首

春塢花冥冥斜陽倒玉餅風塵猶傲吏天地此
空亭共醉薊雲白相看燕草青我來吟澤畔不
是獨爲醒

藉草到流水看花延落暉客中過寒食馬上改
春衣移席青山出開尊白鳥飛天涯有朋好能
使宦情微

夏日同元美徐子旋賈守準劉子成集張
氏園亭得談字

共載杯中物聊停塵外驂路人終白眼世事豈

清談高枕夏雲出空亭斜照含竹間有流水可
以漱餘醅

初夏同元美汪伯陽皇甫子泉集姚明府
園亭得春字

五柳陶潛宅猶藏杜曲春綠陰衣上蒲黃鳥席
邊新河朔當年事風流我輩人胡爲日車馬擾
擾向紅塵

送蔡少府之陽武

君歸寒食後猶及縣中花趨府具茨野鳴鞭博

浪沙大河秋色外使者白雲槎豈不勞行役風
塵見歲華

爲殿卿悼亡

歌梁塵未斷舞袖影方閒落月窺珠鏡青春暗
玉顏爲雲歸峽裏竊藥去人間安得招魂術姍
姍步幄還

荅殿卿

故園春草後書札問同袍海嶽遊當壯風塵卧
正高大名詩裏出浮世酒中逃顧我仍多病時

危小吏勞

送獲嘉郭明府

仙舟新出宰秋色渡淇河官屬諸侯貴君才百里多政齊吳季重地接衛朝歌漢主憂南服長纓送尉佗

雪溪徐山人二首

風塵餘鬢髮天地此栖遲不問家人產寧求國士知門無荷蕢過隣有灌園期得道馮烏几藏名號鹿皮

自有浮雲戀非因倦鳥還林光清客夢湖色駐
人顏歲序高縣榻風塵老抱關不投明月壁
甘
隱大雷山

毛刺史姑茂高齋

武陵看花處二仲得相聞雨白閩天合山青越
微分書聲散秋瀑翰墨染春雲府檄何年事猶
餘猿鶴群

出郭

出郭隨吾適人家杜曲邊溪流縈去馬山路入

鳴蟬禾黍殷秋作
茅茨足晝眠
可能祛物役
歸買汶陽田

張氏園亭

辟疆開別業
載酒雨中看
亭敞千花暝
樓空萬竹寒
呼童移枕簟
勸客解衣冠
宿我山窻下
聽詩坐夜闌

碧雲寺禪房

佛土秋逾淨
花臺夜復香
一燈醒夢幻
孤磬散清涼
月上梵輪滿
湖開天鏡光
新詩分妙偈
病

客對空王

早春元美公實訪茂秦萃嚴精舍同賦

招提多病客擁褐世間情法自傳燈得詩先卓
錫成年光雲樹麗春晝雨花明若許東林住還
携漉酒生

十四夜同王徐宗梁四君子集靈濟宮二

首

愛此壺中約人皆曼倩才萃燈縣日月仙樹接
蓬萊青鳥銜詩去金貂換酒回明宵祠太乙方

士漢宮來

逍遙玄圃望清切紫微層月出三山樹春回萬
井燈無悲田變海但願酒爲滄門外金羈影王
孫自五陵

張山人

吾鄉張仲蔚未是蓬蒿人伏臘東籬下漁樵北
海濱官家還賦役客路且風塵織妾齊紈素開
筵嬌上春

春日

爲客淹歸騎思家過斷鴻春衣花發後寒食雨
聲中生事羞人問時名與衆同自甘郎署隱不
哭宦途窮

柬公實

如何梅發後更憶故園春海上多歸夢天涯一
病人世情元慘淡宦跡好逡巡莫作鴻冥客青
雲未可親

同元美與諸比部早夏城南放舟六首

豈悟風塵客還能汗漫遊天涯唯短髮海內此

扁舟宦跡清時劣，人才畫省優百年。渾淥醕一
日且滄洲。

最憐行役久，爲樂未言疲。自起投車轄，長歌覆
羽卮。江湖青雀舫，僚友白雲司。醒後驚相問，佯
狂信有之。

誰爲河朔飲，吾願罄交驩。杯動滄波色，舟空白
日寒。題詩溪鳥過，岸幘野人看。不是江湖興，風
塵此道難。

落日維舟好，君其問水濱。舉觴遙送鳥，倚樹醉

看人各負詩無敵，翻驚會有神明朝。
在城郭騎馬共風塵。

春歸興不孤勝地，此相呼公等稱詞。
伯余將混酒徒山光含浩蕩，秋意颯江湖。
樂事關窮達，浮生敢自誣。

言尋常杜曲與客放船行，樹影含衣動溪光。
逼酒清狂來出真態，醉裏見浮生。所以山公後，寥寥寥遶者名。

寄茂秦

向來燕市飲此意獨飛揚把袂看人過論詩到
爾長世情搖白首吾道指滄浪去住俱貧病風
塵動渺茫

再遊南溪同應駕部徐比部賦四首

此日南溪約應徐賦客同攬林千竹下進艇百
花中天入華陽館雲生碣石宮昔賢何慘淡吾
醉任鴻濛

覆席花如待窺簾鳥似知到來拚共醉坐久見
吾詩吏跡江湖傲仙才日月欺幸逢休澣出不

顧尚書期

宴遊無俗吏休沐有殊恩
碧草堪同藉紅塵可重論
溪聲留倚杖山色取當樽
夙昔疑吾醉維舟尚在門

花鳥從春過嬉遊到夏偏
白雲行酒上清吹起舟前
世路身何得吾徒賦必傳
寧須千日醉不擬衆人憐

郊行二首

稍似武陵溪人家綠樹迷
桔槔茅屋上荷蓀薊

門西清吹生衣袂繁陰散馬蹄紅塵纔只尺城
郭意多暌

竝馬未央前看雲過灞川時逢黃鳥住欲就綠
陰眠宦豈登臨拙名非案牘傳風塵朋好在回
首汶陽田

東元美二首

偃蹇寧知病今如藥裹何清齋山雨至高枕夏
雲多詞賦芳顏妬風塵壯志過相憐誰最久把
臂此蹉跎

久矣疲朝謁深惟傲吏情臨風看玉樹消渴望
金莖返照虹蜺出浮雲駟馬行慚無枚叔賦起
爾薊門城

夜過元美二首

眼底誰同病天涯好自親放歌依日月縱飲向
風塵世態搖知己時名走衆人朝叅君莫嬾漢
主憶詞臣

病即科頭出狂仍枕腹眠禮非因我設汗不受
人憐興盡銜杯外言深把燭前開門看墮月騎

馮問朝天

夏日同元美子與子相天寧寺送別公實
二首

宴坐人天近清齋僧夏深出門成遠道駐馬向
祇林益愧風塵色相看湖海心惠休能怨別爲
擬碧雲吟

西域黃金地南訛大火天贈言迴白雪寒色動
青蓮幻跡抽簪外浮名把袂前古今皆涕淚去
住各風煙

夏日同元美子與集子相宅

佳客堪常見幽期暑亦過披襟度風雨把酒出
星河嬾拙元相藉文章敢自多夜深忘白羽玉
樹倚蹉跎

東子相二首

已負西山約將無惜壯遊懷人當落日卧病後
清秋時事君高枕風塵我敝裘加餐看物理天
地一虛舟

楚客秋多病羈心私自憐各天散朋好八月見

烽煙白露寒砧下青楓過雁前豈應裁恨賦寫
任故人傳

即事四首

羽書秋色外飛輓海陵迴日上犁庭議時難度
漠才物情竒士過天造異人來側席勞明主黃
金正滿臺

即今難授鉞誰可靜胡塵談笑存能事艱虞失
衆人大軍歸掌握王者自經綸不復憂驕悍如
林護北辰

使者晨馳壁奪歸平虜章自天縣斧鉞擇日設
壇塲萬馬中原集諸軍上苑旁主恩無可報一
戰取名主

天子何神武乘秋欲破胡儒臣擐甲冑大將解
兵符叱咤風雲合艱危日月扶北瞻陵寢色葱
鬱近皇都

賦得屏風

虛屏漢宮裏有女白頭吟色倚琉璃怯秋來湘
水深歡情張畫燭愁坐掩清砧大爲蒼蠅誤君

王在上林

寄元美

寥落文章事相逢白首新微吾竟長夜念爾和
陽春把酒千門雪論交四海人即今燕市裏擊
筑好誰親

贈子與

握手論文者春來限各夫即今行樂處不似舊
游年神物風塵裏時名我輩前豈令徐孺榻白
日此長縣

汪員外移水部時城京師汪爲植

聞有金城役掄茲水部才中原憂被髮使者詠
于鬣睥睨燕山接風雲瀚海來縣知胡騎遁天
子宴蓬萊

度溱沔

溱沔來不極曉色蕩孤城擊楫中流過寨帷下
吏情天銜紆岸轉日上大波行獨在知津後風
塵見濯纓

廣陽山道中

出峽還何地。杉松鬱不開。雷聲千嶂落。雨色萬峯來。地勝紆王事。年饑損吏才。難將憂旱意。涕泣向蒿萊。

趙州道中

獨往何爲者。栖栖意不歡。褰帷秋雨過。伏軾夏雲殘。潦水陰相積。蕪葭晚自寒。大夫方跋涉。天步屬艱難。

吳舍人喪內二首

楚妃色殊衆。不獨下堂悲。鼓瑟瀟湘夜。秋雲未

可持河流雙露掌
月出萬年枝
屬有將雛曲
能無泣鳳池

可憐御溝水
見此白頭吟
病客思江郡
詞臣在上林
春風動花樹
秋月散清砧
唯有陵陽淚
知君抱玉心

別汪正叔員外

幾年金虎署
與爾結交歡
傲吏莊生似
詩家鮑叔看
春光燕樹合
雨色薊門寒
各拭臨岐淚
風塵去住難

懷魏順甫

白雲同署客相念意悠哉
交道蕭朱失文章屈
宋來風塵還傲吏案牘豈時才
不見黃金駿秋
高薊北臺

登黃榆馬陵諸山是太行絕頂處四首

黃榆高不極臨眺亦竒哉
河勢中原坼山形上
黨來白雲橫塞斷寒峽倚
夫開槎落清秋色多
慙作賦才

不盡寒雲外青峯落照多
秋陰生大鹵木葉下

潭沱巨壑藏風雨飛梁挂薜蘿重關三輔地躍
馬意如何

振衣巖木下倚杖白雲層落日縣孤塞清秋度
馬陵千峯寒自出大澤莽相仍左瞰邢襄郡分
符憶股肱

秋色自冥冥風煙接井陘關門開落日山路出
寒星太守方乘障清時敢勒銘杉松迴朔氣哀
壑未堪聽

荅明卿病後見寄二首

薊門搖落後楚客病如何秋色高金掌西風滿
玉珂開樽鴻雁至染翰五雲過應憶山陽會踈
狂阮籍多

吳生何偃蹇稱病不朝天侍從官非拙浮沉世
所憐黃金燕士裏白雪郢人前自識銜杯趣逾
看結襪賢

寄元美二首

夙昔神仙省青雲向爾親償金聊玩世抱玉故
調人氣色高題柱文章老斲輪別來多所憶卧

病上林春

豈不爲同舍于時媿重名佳人誰獨立大將爾
橫行病起高詩興春光美宦情縣知思遠道落
日薊門城

卽事四首

浮雲如浪跡春色且邢州磬折人堪老蕭條客
自愁孤城山下出大陸日西流請郡終何意風
塵復倦遊

天涯看薄宦何以異漂蓬才豈分符後名非薦

疏中黃塵霾落日白羽插春風聞道漁陽戰方
論衛霍功

嬾媢終疑傲和光意遠哉元龍無客禮方朔有
仙才疾苦褰帷過風塵領郡來那須論往事作
賦拓梁臺

使者殊旁午吾生自不辰文章看長物道路竟
何人寒食孤城外禴帷大澤濱那堪楊柳色風
雨傍行春

寄宗考功二首

別離如昨日豈厭廣陵濤春色漁陽蒲烽煙海上高文章迴白雪顧眄解綈袍下走猶三輔蕭條欲二毛

春色還堪起青雲固可披振纓人不病把袂客能詩奏事明光殿掄才藻鏡司嵇康猶自嬾早辱巨源知

寄殿卿二首

人情原慘淡世路故蹉跎意氣彈冠少風塵按劍多客居深雨雪春夢遠漳河賴有西山色猶

堪載酒過

燕山爲客地莫共酒人居吾輩詩名大其徒劍
術踈風塵官不調雨雪歲將除何限東歸意春
花滿舊廬

春興二首

短髮黃塵裏浮生白日徂詩名堪自見經術敢
相誣薦列終才吏逢迎豈壯圖有年輕召杜不
病足江湖

案牘將能事文章敢具陳跳梁看此物隱几過

時人返照生殘雨浮雲矯上春風心唯病免不
欲滯風塵

重送許未寧二首

絕域天應斷揚波海未平浮雲隨薄宦華髮繫
微名傳檄西南定褰帷瘴癘清看君饒卧理經
術晚逾成

世情今可見此謫竟堪陳偃蹇難容汝文章不
利人清秋炎海外落日大荒濱莫更埋銅柱功
名老漢臣

郡齋送張肖甫二首

薊門相憶處豈不問加餐卧理非吾意詩名向
爾看白雲尊酒盡山色郡齋寒莫惜重投轄秋
風道路難

送君何所有城上太行山落日堪相憶浮雲未
可攀俱言張翰去得御李膺還莫自悲秋色能
推壯士顏

閣夜示茂秦四首

相逢殊不惡久別竟誰驪貧病它鄉老交游古

道難開樽山欲出說劍雪逾寒如此蕭條色高齋爾自看

爲客今猶在浮名信已勞病來衰綵筆老至戀綈袍卧閣風塵過銜杯夜色高舊知江夏守不厭襦生豪

病起看時事歸心不可栽著書官欲罷問字客還來月出樽堪滿霜清角自哀相憐成白首明日阻三臺

把袂今何夕高齋雨雪清詩才君矍鑠酒興我

縱橫同病無交態相依豈世情
春來徵渤海陳
對引王生

寄元美四首

我昔朝宗日君停使者軒
並驅皆上駟相遇復
中原草昧詞人起風塵
國士恩別來春色蒲無
處不銷魂

若問除書意君何異積薪
姓名常借客踪跡竟
疑人爲郡空高第當朝
各要津拂衣吾所欲不
是避風塵

白雲樓書集卷之四
漁陽春欲盡漢使未堪愁邊郡多豪俠風塵一
壯遊浮雲寒大漠白日澹幽州莫更觀遼海蕭
條正北流

何悟淹爲郡風塵日以難宦情疎自解人事拙
相看高枕西山色清齋大麓寒期君秋月滿從
此掛吾冠

夏日行部遇明卿子與於慶陶邑

何來漳水上早晚發長安放逐吾曹在風塵此
道難孤城高自卧萬事醉相看莫擊鄒陽劍霜

飛五月寒

郡齋與元美賦

握手今何夕高齋共此樽
衆人方睥睨二子向
乾坤經術從吾淺詩名得爾尊
當時楊馬輩誰復在金門

送元美二首

吾曹天地在不惜滯風塵
意氣能無合文章自有真
齊名他日事側目此時人
爲別還秋色樽前白髮新

把酒論離索，褰帷送友生。
白雲高大麓，秋色重孤城。
偃蹇還詩句，蕭條自世情。
贈君無趙璧，落日片心明。

黃河

復就三秦役，還爲四牡歌。
北風揚片席，大雪渡黃河。
才豈諸郎少，名非一郡多。
儒官明主意，吾道好蹉跎。

關門雪望

西來千里雪，斜日滿函關。
秋水何當落，浮雲自

不還積陰高紫氣寒色壯秦山似欲欺雙鬢蒼
茫到客頭

發長安

此處看春色蕭條客自禁風塵爲郡過踪跡抱
關深不盡傳經意難言作賦心故人多道路薄
宦有登臨

涇州

迴磴層雲上孤城返照間人煙趨白阪睥睨走
青山芻粟浮涇下旌旗度隴還時看乘鄣吏車

馬出蕭關

秋日四首

薄遊寒暑換仍自滯孤城
華髮看人事浮雲識
宦情拂衣驅病色
縣榻避時名但欲眠清晝
相嘲任友生

此物還堪惜何官不可休
驅馳如昨日藥餌更
清秋名已千人廢家徒
四壁愁南山歸自好
沮溺本同流

倦游非一日乘興復三秦
多病難爲客浮名喜

中人未堪沈案牘何以走風塵
祖帳東門外賢哉二老臣

還鄉明日事可柰簿書勞棄置看同病
風塵避二毛酒如涇水濁枕對華山高
不是清秋色何人見反騷

五日和許傳湖亭讌集二首

城頭片雨縣客醉惜湖邊酒柰榴花妬
人堪桂樹憐五絲還令節雙鬢抵流年
莫蹋王孫草淮南賦已傳

白雲村言卷之八
三二
青樽臨比渚一爲故人開
此事成今昔浮雲自
往來花間移枕簟鏡裏出
樓臺忽就投湘賦深
知賈誼才

和殿卿白雲亭醉歌

狂殺王門客空亭日嘯歌
那知珠履散自愛白
雲多短髮明秋水長裾曳
芰荷獨憐枚叟在不
復厭婆娑

元美以家難羈京作此爲唁四首

馳騁淄澠日功名與宦情
高堂一爲坐世路遂

相輕行乞還燕市悲歌復薊城佩刀風雨夜堪
作箭中鳴

一自抽簪後漂零見此身通章尋悟主懷刺
更依人寒入綈袍色愁生黍谷春不因家難劇
君豈在風塵

海內論兄弟蕭條二子才一時稱病罷萬里拂
衣來雨雪人高卧蓬蒿客自回偶然占劍氣夜
夜向燕臺

聞道周旋地偏承老父顏橐籥時在側賓客稍

居闌函谷更封出夷門執轡還莫將公子淚亂
漫灑燕山

春日閑居十首

即令關請謁何用乞江湖僻性終難狎浮名本
易汙杜門人事過歆枕歲華徂薄俗還堪畏崎
嶇比宦途

白日移高枕青山荅放歌病纔宜偃蹇老自厭
婆娑禮數諸生絕交遊二仲多江湖春正滿更
欲混漁簑

藥餌休官嬾蓬蒿謝客深濁醪殊解事高枕自
知音老大翻陵勁文章豈陸沈浮雲終日在蕭
灑竟何心

五穀功名薄雙龍羽翼垂風塵凋短褐雨雪閉
高齋慘淡幽人色飛揚壯士懷少年何太苦妖
冶事形骸

奉使談經日單車西入關掄才牛口下得士鳳
毛間白雪千人失黃河萬里還即今高卧處猶
不減商山

乞歸君已見削迹我何求交態踈能變時名久
自休中原來病色萬里入春愁不是忘機客還
驚海上鷗

結舌論文地甘心養拙年朱門人自老白雪調
空傳世路蓬蒿外浮名燕雀前中原二三子風
昔共周旋

病起獨登臺春光萬里來浮沈還我輩俯仰見
人才華髮風塵過青山雨雪開浮雲堪倚杖落
日好銜杯

漂零唯濁酒落拓總狂生彭澤差聞道高陽橫
得名罷來詩慘淡卧久興淒清日對春湖色潺
湲懶濯纓

五柳嵒湖濱先生隱是真文章堪側目潦倒竟
全身何必論交地長須縱酒人即令東蹈海斷
不混風塵

夏日東村卧病十二首

平生偏伏枕暇日是抽簪病著青山色愁高白
雪音雲霄縣出處踪跡間浮沉不必名俱毀方

知二仲心

放歌知帝力縱飲見天真綵筆風雲老青樽日
月新詩驚噉蔗客酒讓采薇人即使妨幽事何
須傍隱淪

自甘成獨往誰復病相憐金盡論交地囊餘解
擯篇清齋芳藥餌華髮媚林泉不必憂生事深
耕種秫田

不謂幽棲處還堪抱膝吟大雲千里駐片雨二
湖陰暑逼藤蘿淺涼生括栢深鮑山終日在知

已媿黃金

未同踈雨至勿翦夏雲繁
片華樽前出雙流樹杪翻
紅顏辭上國白眼入中原
慢世吾何敢風塵且避喧

拂衣先達恠高枕故人疑
世路衡門左軒車負郭遲
少年誇解事薄俗諱言詩
何處堪遙集悠悠未有期

每逢河朔飲輒憶廣陵濤
起色含佳句流光逼濁醪
興緣知己盡名豈罷官高
髀肉看如此何

論長二毛

空林風雨過瀟灑一樽開看竹俄蠲疾漂蓬敢
負才杜門辭問字落日罷登臺不是憐嵇阮誰
堪把臂來

夜半忽風雨層樓四望孤雷盤萃不注電劃大
明湖雲霧連屏叠蛟龍抱劍呼飛揚天地意垂
老見吾徒

何物子虛賦深承漢主知一逢揚得意千載遂
同時諫獵功名薄爲郎日月私閒居堪避事稱

病足逶迤

更閱人間世誰堪出處同江湖星自客詞賦日
猶工物色餘爭席生涯見轉蓬延陵皮相士竟
失被裘翁

白頭明日事君不見交情千載論知己中原命
友生青雲高病色滄海傍詩名一爲彈冠誤徒
令國士輕

秋日村居八首

隱几憐清曉開軒命濁醪西風行薜荔白露綴

蒲桃氣逼蟬聲苦
天含雁影高
壯心堪自見
秋色正滔滔

病色還相假
秋光溢自開
清羸堪傍竹
潦倒重銜杯
返照湖邊盡
浮雲海上來
即今知九辯
無處不悲哉

秋意長西北
苕蕙望裏分
青含仙署雨
白動帝鄉雲
屈宋終難達
巢由故不群
江湖三十載
搖落好誰聞

南山伏枕前
北渚濯纓邊
林薄秋逾厲
雲霞曉

自鮮談詩成白首把酒望青天萬里中原色
蕭條此地備

不必知名姓中原一病夫柴荆存古色藥餌泥
窮途落日縣魚笥西風纏轆轤生涯君自見百
畝白雲湖

高齋清自掩遙夕病榻看片月花間淨明河樹
杪乾流螢含火著宿鷺抱霜寒何限同袍意江
湖坐渺漫

白雲不搖落湖上長悠悠世事銜杯過人情把

袂休秋光淒自老日色澹相愁况復多風雨蕭
條傍倚樓

搔落唯高枕風塵且閉關醉來雙白眼病起一
青山交態元難作詩名已自閑有人湖海上無
事馬蹄間

冬日村居四首

高卧堪人事幽棲豈世情老松寒更拙片竹冷
逾清擁褐江湖色鳴琴雨雪聲嬾心常近傲不
是學莊生

百年長藥裹三逕且蓬蒿華髮抽簪短青山伏
枕高漂零知濁酒兩雪見緋袍似解冥鴻意翻
然愛羽毛

寒郊不可望蕭瑟掩柴扉宿霧含霜苦斜陽帶
雪微清齋宜病色生事合漁磯欲奏滄浪曲江
湖此調稀

遙夜憐幽獨南山傍戶庭泉流霜下白野色海
邊青風亂將殘寒踈欲曉星偶因樵唱起延
眺及林垆

寄華從龍比以魚橘見致

多少人間事誰能便作書
罷官君更早謝客我
何踈八月來吳橘三江下楚魚
因風裁數字一問子雲廬

月

不是山中月誰能坐鬱陶
蟾孤憐凍影兔老愛
霜毫暈疊金波動寒侵玉樹高
爲題團扇句千里寄同袍

和殿卿神通寺見貽之作

花宮留妙唱，綵筆遍高僧。說法從初地，談詩出
上乘。五言爭刻燭，一字了傳燈。玄度前身是，風
流益可憑。

同許右史遊南山宿天井寺

古寺馬蹄前，荒山斷復連。階危孤石倒，厓響亂
泉懸。喬木堪知午，迴峰半隱天。不因許玄度，誰
此得攀緣。

龍集寺

雙林窺壑險，一徑入雲愁。峰落青蓮色，燈懸白

日幽香臺高枕出澗水閉門流聞道群龍集明珠自可求

錦陽川九塔寺觀許右史碑

名山諧夙好况復近吾廬嵐影浮斜照茲川錦不如空林雙樹老寒塔九華踈一片頭陀石新文六代餘

元日

五十江湖客風塵一事遠漁樵供藥餌雨雪偃荆扉白髮詩篇苦清齋病色微平生拚縱酒今

日不知非

立春前夜齋居殿卿携具見枉

茅齋殘雪在新月况當門春動西園蓋寒空北海樽詩篇閑自遣交態老難論似覺行厨色能清病客魂

立春日齋居對雪憶元美

齋居何所作春雪是佳期淨入年華淺光含暝色遲鳴絃流豔曲拂簡映新詩此夕山陰客扁舟興可知

龔生初度與郭子坤集開元寺餞許右史
論交三十載此地重尋盟夏臘高初度人天戀
遠行青蓮澄筆彩白馬識經聲曾是春山夜談
禪對友生

逃暑

無處堪逃暑高樓坐夜分河流纏宿霧電影迸
重雲紈扇含水彩珠簾網露文漢宮多貴幸何
以荅南薰

暴雨

西來氛甚惡夏至此何祥雨伏千厓怒風廻萬壑
長雷聲盤暗牖電影纏空梁少選虹霓出園林媚夕陽

寄子與使君二首

一郡看如此扁舟意若何白雲天目遍春水太湖多怪事寧詞賦幽人自薜蘿平生無俗客三徑許誰過

我輩還堪見人間已厭聞大都常謝客不謂重離群病酒仍耽句青山自白雲春來論數子飄

泊有如君

襲克懋託疾不肯入試贈此

似得冥鴻意燕深抱壁情一鳴堪自失三獻轉
相輕白雪看前輩青雲讓後生已須橫四海且
復愛連城

二月十五日誕子

三十盧家妾明珠報使君國香元有種天馬自
超群月應縣弧滿春迎翦綬分負薪還爾事豈
敢望青雲

荅寄余德甫二首

豈亦逢仙色
登臨若遠行
江通灌嬰井
山到越王城
何見非交態
難言一宦情
大東千里石
鏡好同明

即聞彭蠡雁
應上武陽臺
華髮文章到
青山放逐回
時名堪下榻
秋興足銜杯
不是求羊輩
蓬蒿斷徃來

過呂梁

十年稱病客
繫楫在樓舡
漸下波方溜
風鳴水

正縣青山高卧裏華髮壯遊前起色聊相借終
慚傲吏賢

席上別王吳徐宗四子

仙吏蒲蓬萊離筵氣色開襜帷寒食過風雨太
行來一失中原遇難論我輩才華陽猶駿馬消
者載金廼

荅元美喜于鱗被召見寄二首

十年君所見已分老蓬蒿安得浮名在將無執
事勞海鷗群自下天馬步元高五柳還須種徵

君不姓陶

那堪成僻性非不愛明時白髮終憐我青山好
屬誰連城高一抱流水妙相知君自墻東客行
藏豈更疑

宦情二首

初服終能事餘生已自違浮雲知失計漚鳥見
忘機越酒經春老江魚入夏肥他鄉如不病一
任宦情微

我輩誠何意于今自解難纍寧知衆婢儂已罷

新歡白雪狂歌盡青雲病疏看江湖終日在一
任宦情闌

再過子與

浮名難自託佳會豈相圖日月高詩社河山壯
酒壚歲星時一出白雪調元孤繾綣非為佞風
流不可無

劉太保文安公輓章十首

贈謚

上公霑異典美謚衣餘恩文竝三光麗安同五

嶽尊 朝廷先達在社稷大名存廟議當時事
稱天有世孫

諭祭

遺奠煩容物臨軒意典刑祠官開正寢法從輟
明庭筵几知存問鍾彛藉寵靈老臣如就饗帷
幄見談經

賜塋

使從三省至地自九原開不作祁連象寧知漢
代才佳城踣躑躅法駕擁徘徊文劍今埋照于

馬獨夜臺

頌誥

國史從王事經筵飶 帝慈龍章紆後寵魚水
見前知雨露含天藻山河勒制辭門生堪視草
猶作起家疑

立碑

峴首羊公石千秋淚不禁孤墳寒自出萃表鬱
相臨陰雨意文動風霜鳥跡深更聞辭妙絕一
字可生金

遺文

自復遺書與相傳斤字工史才依晉乘詩調託
唐風草疏回天力談經奏聖聰少年耽作賦頗
欲擬河東

特祠

祠堂何所有遺像鹿臺山為是縣車處常聞曳
履還諸生從上黨三老自壺關伏臘蘋蘩外談
經俎豆間

世科

諸劉稱令族郡從復清操家自駒千里人皆鳳
一毛文章爭左袒禮樂盛東曹五世傳經術推
公甲第高

達尊坊

一時求舊德千載憶皇都北斗高光氣南山永
帝圖青雲餘几杖白首自江湖此日乘驄客閭
門意不孤

從祀外賢

小子元吾賢前賢亦故鄉春秋存俎豆日月望

宮牆血食必千秋
精靈自一堂
建德爲伯超
蘇晉鬱相與